



Sesida dals

25 d'october 2022

Communitgà ils

28 d'october 2022

Protocol nr.

818/2022

Incumbensa Michael (Donat)

concernent l'applicaziun da la clausula generala da polizia per allontanar il triep dal Beverin sco er tut ils lufs che han in cumportament problematic e che impedeschan ina coesistenza

Resposta da la Regenza

Tenor l'art. 5 da la Constituziun federala (Cst.; CS 101) è il dretg la basa ed il limit da l'activitad dal stadi. In'excepziun da quest princip è la clausula generala da polizia sco ultima pussaivladad per prevegnir ad in privel imminent. Er sche questa pussaivladad è indispensabla, per ch'il stadi possia agir en moda flexibla e conform a la situaziun, è ella suttaposta al privel d'abus. Perquai dastga ella vegnir applitgada mo en cas excepziunals absoluts. Tenor la giurisdicziun dal Tribunal federal ston las suandantas premissas esser ademplidas en moda cumulativa: Sco emprim ston esser pertutgads bains protegids fitg elevads (fundamentals) dal stadi u da persunas singulas. Latiers tutgan en spezial la segirezza publica u la protecziun dal corp e da la vita. Sco segund ston quests bains protegids esser exponids ad in privel serius ed imminent che donnegescha cun ina probabilitad adequata quests bains. Quai ston esser donns considerabels, betg mo simpels dischavantatgs. Sco terz vegni premess ch'i na dettia naginas mesiras legalas adattadas e che quellas na sa laschian – pervia da l'urgenza – er betg crear svelt. E sco quart sto vegnir garantida la commensurabladad en connex cun l'applicaziun da la clausula generala da polizia, en spezial sto quai esser la mesira adequata la pli miaivla.

Tar il punct 1: Ils animals che appartegnan a trieps e che han in cumportament problematic vegnan sajettads en il rom da la regulaziun ch'è fixada explicitamain en la legislaziun federala da chatscha (art. 12 al. 4 da la Lescha federala da chatscha [LChP; CS 922.0] en cumbinaziun cun l'art. 4^{bis} da l'Ordinaziun federala da chatscha [OChP; CS 922.01]). Sco menziunà en l'intervenziun sezza han gia plirs lufs dal triep dal Beverin pudì vegnir sajettads sin fundament da questa basa legala, er pervia dal causal da la periclitaziun considerabla d'umans. Perquai ch'igl è reglà tras lescha, co ch'ins sto proceder, sche animals da trieps pericliteschan considerablamain umans u chaschunan donns, n'èsi – ord vista giuridica – strusch pussaivel d'applitgar la clausula generala da polizia. En spezial na porscha ella sut circumstanzas regularas nagina pussaivladad da sajettar in entir triep.

Tar il punct 2: Cuntrari ad animals da trieps n'exista nagina regulaziun legala explicita areguard il tractament da singuls lufs cun in cumportament problematic. En la lescha exista pia ina largia che pussibilitescha al chantun da sajettar singuls lufs sin basa da la clausula generala da polizia per mantegnair la segirezza publica. Da questa pussaivladad ha il chantun fatg diever il cumenzament da quest onn, cura ch'el ha sajettà sisum la Surselva in luf cun in cumportament problematic. En quest connex han ins stuì agir svelt, perquai ch'igl aveva dà paucs dis avant in inscunter privlus tranter il luf ed ina persuna. Quai, suenter ch'ins aveva observà durant in temp pli lung ina mancanza da timiditad sco conseguenza d'in process d'endisada respectivamain sco conseguenza d'in svilup disfavuraivel dal cumportament dal luf envers ils umans. Sche las premissas èn ademplidas – vul dir en cas d'urgenza ed en cas, nua che baints giuridics fundamentals èn exponids ad in privel serius ed imminent che na sa lascha betg prevegnir autramain – vegn il chantun a far diever er en l'avegnir da questa basa giuridica substitutiva. I sto dentant vegnir menziunà che lufs dastgan vegnir sajettads cun agid da la clausula generala da polizia mo sco ultim med, sche tut las mesiras pli miaivlas han disditg.

Il svilup actual dal luf fa quitads als posts chantunals cumpetents ed è ina gronda sfida per tut las parts partecipadas. Il chantun ed ils posts da servetsch cumpetents han dapi onns la medema tenuta: Ils chantuns ston avoir la pussaivladad da regular la populaziun da lufs analogamain ad autras spezias d'animals selvadis, avant ch'i dat donns. Per quest intent dovri las basas giuridicas necessarias. Il project da revisiun inizià va en la dretga direcziun. Independentamain da quai è la Regenza dentant vinavant pronta d'applitgar la clausula generala da polizia, sche las premissas giuridicas èn ademplidas. Sa basond sin questas explicaziuns propona la Regenza al Cussegl grond da midar l'incumbensa qua avant maun sco suonda:

La Regenza sustegna il project inizià per la revisiun da la LChP, cun la finamira da regular la populaziun da lufs analogamain ad autras spezias d'animals selvadis. Sa basond sin la clausula generala da polizia sajetta il chantun vinavant lufs, sche las premissas èn ademplidas.



En num da la Regenza

Il president:

Marcus Caduff

Il chancelier:

Daniel Spadin